

Usaha Ubah Masyarakat Harus Bermula Dengan Perubahan Pemikiran

Oleh

Mohamed Imran Mohamed Taib

Pembaharuan dalam segala bidang kehidupan bukanlah sesuatu yang asing. Namun, apa jua upaya untuk merubah sesuatu yang dianggap jumud (lapuk) dan tidak lagi berfungsi sering mendatangkan keresahan secara umum.

Perubahan adalah suatu proses yang tidak dapat dielak. Setiap masyarakat memerlukan pembaharuan demi penakatan. Pembaharuan membolehkan sesebuah masyarakat terus berkembang serta mengharungi perubahan masa dan konteks.

Pembaharuan juga bukanlah perkara asing di dalam bidang pemikiran keislaman. Menurut sebuah hadis riwayat Abi 'Alqamah, Allah swt akan mengutuskan seorang *mujaddid* (pembaharu) dalam setiap awal kurun untuk menghidupkan syiar Islam. Istilah seperti *islah*, *tajdid*, *ihya* dan *nahdhab* sering dikaitkan dengan pembaharuan dalam sejarah pemikiran Islam.

Pembaharuan adalah sebahagian daripada dinamika agama untuk terus menjadi relevan dalam konteks perubahan waktu dan situasi. Menurut pemikir besar rantau ini, Allahyarham Profesor Syed Hussein Alatas, pembaharuan adalah suatu upaya penting untuk menyegarkan kembali ajaran dan nilai asas agama. Teras utama upaya pembaharuan seperti ini jelas termaktub di dalam kebijakan pepatah Arab: *Mempertahankan yang lama, yang baik, dan mengambil yang baru, yang terbaik.*

Istilah 'pembaharuan' bermaksud segala upaya untuk mengkritik struktur dan keadaan dalam masyarakat dengan harapan menggantikannya dengan sesuatu yang dianggap lebih baik ataupun lebih dekat dengan pesan sebenar agama.

Antara contoh gerakan pembaharuan ini dalam sejarah Islam ialah gerakan puritan Wahhabi di Hijaz pada abad ke-18; gerakan salafi-modenis abad ke-19 di Mesir; gerakan konservatisme Darul Uloom dan Deoband di benua India pada abad ke-19; gerakan Tanzimat dan Young Turks (kebangkitan anak muda) di Turkey pada abad ke-19; gerakan Kaum Muda dan Muhammadiyah di rantau Melayu-Indonesia pada awal abad ke-20; gerakan fundamentalisme kelompok Ikhwan Muslimun pada pertengahan abad ke-20; dan gerakan liberalisme yang dipengaruhi oleh para pemikir seperti Qasim Amin, Sayyid al-Lutfhi, Ali Abd al-Razziq, Fazlur Rahman, Nasr Hamid Abu Zayd, Muhammad Arkoun dan Nurcholish Madjid dari abad ke-19 hingga era kini.

Penting dinyatakan juga bahawa sebahagian gerakan ini telah berupaya menggantikan pola pemikiran lama dengan yang baru. Sebahagian yang lain pula gagal dan terus disisih daripada arus perdana pemikiran Islam.

Arah tuju setiap gerakan pembaharuan ini berbeza-beza mengikut keadaan dan interaksinya dengan faktor lain seperti sistem politik, ekonomi dan struktur masyarakat. Ada gerakan yang mampu bertahan dan menyumbang kepada pembangunan tradisi Islam yang progresif. Ada pula menjadi regresif (mundur) dan membawa kepada pelbagai masalah, seperti ekstremisme (faham pelampau), dogmatisisme (fahaman sempit) dan antiintelektualisme (faham menentang perkembangan daya fikir).

Sepanjang sejarah pemikiran Islam, kita akur akan sumbangan para pemikir yang berupaya menyumbang kepada proses pembaharuan dan pembinaan tamadun pemikiran Islam umumnya. Antara mereka adalah Ibn Khaldun, Ibn Taymiyyah, Sayyid Ahmad al-Sirhindi dan Shah Waliyullah pada abad pramoden; Rifaat al-Tahtawi, Jamaluddin al-Afghani, Muhammad 'Abduh, Sayyid Ahmad Khan dan Sayyid Ameer Ali pada zaman awal kemodenan; dan Muhammad Iqbal, Ziya Gokalp, Said Nursi dan Ali Shari'ati pada zaman moden lewat.

Hari ini, tradisi pembaharuan diteruskan oleh para pemikir semasa atau kontemporari yang merangkumi pelbagai bidang, falsafah dan orientasi, seperti Abdolkarim Soroush,

Mohammed Abed alJabri, Hassan Hanafi, Fatima Mernissi, Farid Esack, Muhammad Shahrur, Yusuf al-Qardhawi, Seyyed Hossein Nasr, Abdullahi Ahmed An-Naeem, Asghar Ali Engineer dan Khaled Abou El Fadl.

Rantau Asia Tenggara ini sendiri tidak langka dengan kewujudan para pemikir kreatif yang menyumbang ke arah pembinaan tamadun pemikiran keislaman secara umum. Dari zaman pramoden, moden atau kontemporari, Dunia Melayu-Indonesia telah menyaksikan kebangkitan pola-pola pemikiran yang berbeza-beza atas upaya para pemikir seperti Hamzah Fansuri, Bukhari al-Jauhari, Nuruddin al-Raniri, Nawawi al-Bantani, Abdus Samad al-Falimbani, Daud al-Patani, Ahmad Dahlan, Ahmad Sukarti, Syed Sheikh al-Hadi, Agus Salim, Muhammad Natsir, Hamka, Harun Nasution, Munawwir Sjadzali, Abdurrahman Wahid, Nurcholish Madjid, Syed Hussein Alatas, Syed Muhammad Naquib al-Attas dan Chandra Muzaffar.

Setiap pemikir tadi mungkin mempunyai haluan keagamaan dan kecenderungan berbeza-beza, namun sumbangan mereka kepada proses mencari arah tuju kehidupan beragama masyarakat Islam di dunia harus dikaji dan dinilai sewajarnya.

Tugas membina semula (rekonstruksi) pemikiran Islam masa kini harus mengambil kira interaksi dan reaksi yang muncul daripada pergelutan produk-produk pemikiran ini atas kehidupan beragama di dalam semua bidang, termasuk pendidikan, ekonomi, politik dan budaya.

Sejarah perkembangan masyarakat Islam di rantau ini mendedahkan bagaimana corak pemikiran dan orientasi agama membawa kesan cukup besar. Contohnya, sejak awal abad ke-18 corak pemikiran Wahhabi telah mempengaruhi kemunculan gerakan Paderi di Sumatera yang cuba menerapkan corak Islam 'murni' (puritan) ke dalam masyarakat tradisional Minang. Ia berlaku sejak kepulangan beberapa individu daripada pengajian di Makkah dan Madinah, yang menampung gerakan Muhammad ibn Abd al-Wahhab.

Abad ke-19 pula menyaksikan bertapaknya corak pemikiran modernisme serangkaian dengan gerakan pembaharuan Muhammad 'Abduh di Mesir.

Yang menarik, Singapura menjadi pusat utama di dalam penyebaran gagasan reformisme ini sehingga terbina madrasah modenis pertama, iaitu Madrasah Iqbal al-Islamiyyah, dan juga penerbitan majalah Al-Imam yang berpengaruh.

Suasana politik sesudah kemerdekaan mempunyai kesan penting dan menarik ke atas kemunculan dan perkembangan sesuatu bentuk pemikiran. Contohnya, dekad 1970-an dan 1980-an telah membangkitkan semangat dan gerakan dakwah yang memainkan peranan penting dalam percaturan politik dan sosial masyarakat Melayu rantau ini.

Gagasan para pemikir fundamentalis seperti Abul a'la Maududi, Seyyed Qutb, Maryam Jameelah, Fathi Yakan dan Muhammad Asad amat berpengaruh dan diterapkan melalui sistem usrah dan perkhemahan pembangunan belia. Kemunculan gerakan dakwah ini pula terkait dengan keadaan jagat, antara lain:

- kekalahan bangsa Arab dalam Perang Arab-Israel 1967;
- kekayaan mendadak Negara-Negara Pengeksport Minyak (Opec) setelah krisis minyak pada tahun 1973;
- kemunculan Arab Saudi selaku pengaruh utama Dunia Islam, dan,
- kejatuhan rejim Shah di Iran yang digantikan dengan penubuhan negara Islam Syiah.

Situasi setempat pula diwarnai antara lain oleh:

- kemunculan kelas menengah akibat perubahan struktur masyarakat;
- penghijrahan anak muda dari desa ke bandar;
- penubuhan institusi pendidikan tinggi yang membangkitkan gerakan pelajar;
- pertarungan politik dan ideologi, dan
- penyebaran teknologi media massa yang sekaligus menjalin rantau ini dengan perkembangan dunia luar.

Perkembangan masyarakat Islam di Indonesia pula agak berbeza. Sebagai contoh, percaturan politik rejim Suharto telah memberi ruang kepada corak pemikiran

neomodernisme untuk bergerak. Ia dipelopori oleh para pemikir progresif seperti Mukti Ali di biro agama, Harun Nasution di institusi perguruan tinggi, Nurcholish Madjid di Yayasan Paramadina, Abdurrahman Wahid di Nahdlatul Ulama dan Syafi'i Maarif di Muhammadiyah.

Hasilnya, masyarakat Indonesia berdepan dengan kemunculan gagasan yang membawakan suatu corak Islam yang terbuka dan luas. Ia juga mengatur suai Islam dalam masyarakat majmuk dan beragam.

Setiap masyarakat yang ingin maju harus belajar daripada kesan sejarah dan peka akan corak pemikiran yang ada. Setiap kemajuan dan kemunduran mempunyai sebab dan natijah daripada pengalaman sejarah dan corak pemikiran.

Oleh itu, rekonstruksi masyarakat demi meraih kemajuan haruslah bermula daripada rekonstruksi pemikiran. Apatah lagi, setiap pemikiran itu boleh membangun atau meruntuhkan peradaban manusia. Inilah pengajaran daripada sejarah.

[Artikel ini telah disiarkan di *Berita Harian*, 1 Mac 2008.]